

<input type="radio"/> Senin	<input type="radio"/> Selasa	<input type="radio"/> Rabu	<input checked="" type="radio"/> Kamis	<input type="radio"/> Jumat	<input type="radio"/> Sabtu	<input type="radio"/> Minggu
1	2	3	4	5	6	7
17	18	19	20	21	22	23
24	25	26	27	28	29	30
31						
<input type="radio"/> Jan	<input type="radio"/> Feb	<input type="radio"/> Mar	<input type="radio"/> Apr	<input type="radio"/> Mei	<input type="radio"/> Jun	<input type="radio"/> Jul
<input type="radio"/> Aug	<input type="radio"/> Sep	<input checked="" type="radio"/> Okt	<input type="radio"/> Nov	<input type="radio"/> Des		



# Palangsiang

Ku Evi Fuji Fauziyah

**S**awah héjo ngémploh. Cai nyurulung ti pancuran. Kebon téh nu

ngeplak. Ngan hanjakal ukur aya na implengan. Ayeuna aya gé leuwi nu

pinuh ku runtah. Sawah geus jadi jalan gedé. Kebon entéh tinggal carita.

Dedeuh teuing, ieu geuning lembur kuring. Nu ti baheula dianti-anti, kiwari tinggal carita.

Enya mémang kuring teureuh Sunda. Indung bapa asli Sunda. Tapi kuring henteu gedé di dieu, di tanah Sunda. Ayeuna kuring mulang ka lemah cai, sanggeus ngumbara 24 taun ngalalana di nagri dungeun.

Bapa kuring téh diplo-

mat Indonesia keur Amerika. Harita basa kuring na jero beuteung kénéh. Lahir jeung sakola SD di ditu. Barang asup ka SMP bapa pindah tugas ka Spanyol, nepi ka bérés SMA kuring cicing di dinya. Sakola jeung néangan élmu di Spanyol.

Ayeuna kuring geus bérés kuliah S2. Bapa jeung Ambu bosen ngalalana. Hayang mulang ka lembur sorangan.

Hayang nyawah, ngais incu, moyan di buruan, siduru hareupeun hawu, jeung nyair lauk di balong. Basajan mémang. Tapi éta nu dipikahayang ku nu jadi kolot.

Kuring balik ka lembur. Diparengkeun meunang gawé jadi dosén.

Cenah pédaħ kuring S1 jeung S2 hukum lulusan walanda. Jadi babari meu-nang gawéna. Jeung pada hayang deuih kuring gawé di éta kampus nu nyong-colang téh. Kuring jadi salah sahiji dosén hukum di universitas nu kasohor di Bandung.

\*\*\*

Poé kahiji di kampus, kuring dikenalkeun ka dosén-dosén nu lian, make basa inggris.

Hampura kuring teu bisa basa Indonésia. Da kolot kuring mah ngan ngajark-eun basa Sunda di imah téh, boh di Amerika boh di Eropah. Ngan hanjakal eweuh nu ngajak ngobrol make basa Sunda. Samarukna kuring téh teu bisaeun basa Sunda me-reun. Pék baé ari malikir kitu mah.

"So Mr Aksa, they are the staff teacher in this faculty, if you need something you can tell them what you need" (Pak Aksa tah ieu téh

staff dosen di fakultas hukum, mun butuh nanaon tiasa nyarios sareng nyungkeun bantasan ka sadayana) ceuk Pa Sumpena, Dékan Fakultas Hukum.

"*Thanks for the information Mr Sumpena, I wish we can be a good partner then.*" (hatur nuhun kana infona pa sumpena, mugia urang tiasa damel sasarengan) témbal kuring ka nu araya di dinya.

Aksa Dibrata, umur kakara 24 taun.

Dosén anyar pangorana nu keur jadi sabiwir hiji minggu ayeuna. Loba mahasiswa nu merenyéng hayang kenalan, marake basa inggris deuih. Sakapeung hayang seuri, awéwé gareulis mojang Bandung téh ngarajak kenalan maké basa Indonesia, hanjakal kuring teu bisa. Nya geus wé dijawab ku basa inggris. Meureun gara-gara di kelas kuring ngajar maké basa inggris. Tapi dalah dikumaha atuh kuringna teu bisa ari kudu nyarita dina basa Indonesia mah.

\*\*\*

Geus aya sabulan kuring di dieu, hirup di Bandung. Tapi naha, mana jelema nu ngaromong Sunda téh? Meuni eweuheun pisan. Cenah Bandung téh tatar pasundan, tapi mana nu ngomong basa Sundana? Euweuh jelema nu ngajak ngobrol ka kuring maké basa Sunda, lolobana maké basa inggris atawa Indonesia.

Keheul, kesel. Baheula keur di Amerika, Ambu nyarita ka kuring yén di Bandung téh jelema lolobana maké basa Sunda.

"Matak Aksa pami palay ameng sareng barudak

Bandung, Aksa kedah tiasa nyarios basa Sunda," kitu ceuk Ambu.

"Teras naha Aksa teu diajar nyarios dina basa Indonesia Mbu?"

"Kumargi basa Indonesia mah gampil Sa. Engke gé pamti tos di ditu Aksa bakal tiasa nyarios basa Indonésia. Teu cara Sunda, pamti aalit henteu diajar nyarios Sunda, tos ageung bakal sesah nyarios Sundana."

"Muhun atuh Mbu, Aksa hoyong tiasa basa Sunda, hoyong ameng jeung barudak Bandung nu tiasaan ngadamel ketepél," témbal kuring bari nunjuk kana gambar ketepél dina kartu pos nu dibawa ku indung kuring ti Bandung.

Lima belas taun katukang éta obrolan kuring jeung indung kuring. Ayeuna kuring aya di dieu, di Bandung. Tapi eweuh ketepél nu jadi bahan bébénjokeneun baheula. Ngan aya hapé, tablet, jeung game portabel séjenna. Naon bedana atuh Amérika jeung di dieu ari kitu mah?

Na ka marana barudak Bandung nu jago nyieun ketepél téh? Kuring panasaran, hayang ngan-jang ka lemah cai nu jadi caritaan kuring di pangumbaaran.

\*\*\*

Lamunan kuring di kantin kampus kagareuwah-keun ku hiji awéwé nu ambek-ambekan harepeun pisan méja kuring. Tutunjuk bari molotot ka palayan. Angger, nyarékan-na maké basa Indonesia. Kuring teu ngarti, ngan pas pisan kuring dek ngahuap-keun sangu konéng, eta awéwé nyarékan Mang Tarma, palayan kantin maké basa Sunda. Bari jol

dék nampiling. Langsung kuring nangtung bari nyekel lengeunna, bari sabisa-bisa ku kuring diomongan.

"Néng teu kéging kitu ka sepuh téh bilih kawalat. Pamali, ulah codéka. Mang Tarna téh da teu ngahaja ngalebetkeun saos kana baso Enéng. Asa teu kedah ari nampiling mah."

Eta awéwé ngan ngabetem cicing melongkeun kuring. Héraneun bari semu beureum beungeutna bakat ku éraeun. Nu araya di kantin éta mémang ngan barudak kuliah wungkul, ngan hiji dua nu ngartieun kana omongan kuring. Tapi ari nu nénjokeun mah, kabéh gé narénjo-keun. Éta awéwé nyokot kantongna jeung ngabecir lumpat ka tempat parkir. Rék balik, kitu ceuk pikir téh.

Deuh rajeun maké basa Sunda tapi dipakéna pas keur ngambek. Atawa keur nyarékan batur. Naha kieu kitu kondisi urang Sunda ayeuna?

Ah teuing teu nyaho. Da kuring mah can lila aya di tatar Sundana gé. Sugan wé ieu mah ngan pikiran kuring wungkul.

\*\*\*

*Nu nulis mahasiswa Jurusan Sastra Sunda Unpad. Kungsi nyuprih élmu salila genep bulan di Korea Selatan salaku Delegasi Student exchange Ajou Spring Semester Programa taun 2011 jeung narima beasiswa jeung delegasi Indonesia English Language Study Programe (IELSP) di Iowa State University, Amerika Serikat taun 2012*